

Egn project pigl proxim tschantaner

Avànt 91 ons e cumparieu igl ampren cudesch digls quater toms da la voluminusa «Flora digl Grischùn». Tut las flurs, plàntas a tgaglioms ancunaschaints alura en vagnieus documentos. Igls editurs en stos tant igl ple ancunaschaint botanist grischùn digl 20avel tschantaner Josias Braun-Blanquet sco ear igl professor turitges Eduard Rübel.


GIERI BATTAGLIA

Par festivar igl 100avel giubileum da la «Flora digl Grischùn» digls 2032 e'gl egna grupa da lavur c'â lantscho igl on passo igl project «Flora Raetica». Suainter egn tschantaner marco da l'intensivaziùn digl diever da la cultira a la midada climatica e'gl da basegns da retschartgear la darasaziùn actuala a la frequenza da tut las plàntas digl Grischùn par cumparagliear igl stadi d'ozigli cun quel d'avànt 100 ons.

An que conex satract'igl surtut da sclarir amparadas sco: Tge plàntas creschan ozigligi agl noss cantùn? Qualas en davatadas raras near en tutaveia svanidas an que tains? Tge spezias en migradas ad òlt an que interval? Tge plàntas eastras schmanatschan la flora indigena? A qualas maretan schurmetg spezial?

Var 200 000 observaziùns

Las raspostas a talas amparadas den sensibilisar vasts tschearcals da la populaziùn grischùna par la valeta da la flora indigena a da la



Igl frontispezi da l'amprema «Flora digl Grischùn» da Josias Braun-Blanquet a Eduard Rübel digls 1932.

FOTO GIERI BATTAGLIA

biodiversitad. Prest 600 dellas a dels ân anzunzgieu var 200 000 observaziùns davent da c'igl project e vagnieu lantscho. L'observaziùn digl liac ple bass deriva da San Vittore (255 m s.m.), quella digl liac ple òlt e stada fatga segl Piz Tschierva (3534 m s.m.). La dafna near ear numnada «pever mundan» (Seidelbast) e actualmeing a la testa da la glista digl inventari cun 855 las anzunzgas.

Amaturas ad amatur da plàntas digl Grischùn a da l'antiera Svizra ca vutan cunluvrar da maniera voluntaria par inventarisar la flora grischùna, en venavànt bagnvagnieus da ler saptizipar. Impurtant e surtut igl plascher par la natira a la viglia da colavurar cun que project a lunga vesta. Far part dastgan ear botanistas near botanists amatur ca fan lur observaziùns da plàntas.

Par ulteriuras infurmaziùns a sclarir amparadas vigilian ign sadrizar ad Ingrid Jansen, contact@florae.ch, www.florae.ch.